

<><><><><><>

एह आकाशवाणी जम्मू ऐ, बड्डलै खबरें च तुंदा सुआगत, पैहले खास-खास खबरें कन्नै में कुनाल श्रीवत्स।

Headlines

1. पाकिस्तान आस्सेआ भारत दे रिहायशी इलाकें गी नशाना बनाने दी हिमाकत दा भारत नै जोरदार परता दित्ता। पाकिस्तान दियां केई चौकियां ते आतंकी ठकाने तबाह, श्रीनगर, जम्मू, फिरोजपुर, पठानकोट, जैसलमेर ते भुज सनें 26 थाहरें पाकिस्तानी ड्रोन हमलें दी कोश्ट गी नाकाम कीता गेआ।
2. प्रधानमंत्री नरेन्द्र मोदी होरें रक्षा मंत्री, राष्ट्रीय सुरक्षा सलाहकार ते त्रौनें सेनाएं दे प्रमुखें कन्नै उच्ची सतह दी बैठक लाई।
3. मुखमंत्री उमर अब्दुल्ला होरें बन्ने कन्नै लगदे इलाकें च राहत बंदोबस्त दी समीक्षा कीती। प्रशासन गी सौहगा सतर्क रौहने लेई आखेआ।
4. बक्ख-बक्ख मंत्रिण सरहदी इलाकें दा दौरा कीता, राहत उपाएं ते सुरक्षा थाहरें पजाए गेदे लोकें लेई सुविधाएं दा जायजा लैता।
5. उत्तर ते पच्छमी भारत दे इलाकें च 32 ब्हाई अड्डें पर ब्हाई डोआरियां 15 मई तगर आरजी तौरा पर बंद रखियां गेइयां न।

<><><><><><>

हून खबरें दी तपसील कन्नै जगमोहन शर्मा।

<><><><><><>

Drones Pakistan

भारतीय फौज नै पाकिस्तान आस्सेआ साढ़े फौजी ठकाने ते रिहायशी इलाकें गी नशाना बनाइयै कीती गेदी भारी गोलीबारी ते ड्रोन हमले देपरते च कारवाई करदे होई जम्मू कन्नै लगदे बन्ने दे पार केई पाकिस्तानी चौकिण ते आतंकवादिण दे लांचिंग पैड्स गी तबाह करी दित्ती ऐ जित्थुआं ओ ड्रोन इत्त बक्खी भेजा करदा हा। एहदे शा पैहले भारतीय फौज नै पाकिस्तान कन्नै लगदे अंतराष्ट्रीय बन्ने ते नियंत्रण रेखा पर जम्मू कश्मीर दे बारामुला कोला लेइयै गुजरात दे भुज तगर 26 बक्ख-बक्ख थाहरें पर पाकिस्तान नै ड्रोन हमले गी नकाम करी दित्ता ऐ। इंदे च ओ ड्रोन बी शामिल न, जेह्दे रिहायशी इलाकें ते फौजी ठकाने लेई बी खतरा बनी सकदे हे। रक्षा सूत्रें मूजब इनें थाहरें च बारामुला, श्रीनगर, अवंतीपोरा, नगरोटा, जम्मू, फिरोजपुर, नठानकोट, फाजिल्का, लालगढ़, जैसलमेर, बाडमेर, कुआरबेट, भुज ते लखी नाला शामिल न। ताजा हालात दी जानकारी सांझा करने लेई विदेश मंत्रालय ते रक्षा मंत्रालय अज्ज बडलै साढ़े 10 बजे प्रेस वार्ता करोग।

<><><><><><>

PM-Meeting

भारत ते पाकिस्तान बश्कार बनी दी तनोतनी आली ज़िथति दे चलदे प्रधानमंत्री नरेन्द्र मोदी होरें कल त्रौने सेनाएं जिंदे च थल सेना, वायुसेना ते नौसेना शामिल न, दे प्रमुखें कन्ने इक उच्ची सतह दी बैठक दी अध्यक्षता कीती। बैठक च रक्षा मंत्री राजनाथ सिंह ते राष्ट्रीय सुरक्षा सलाहकार अजीत डोभाल होर बी मजूद हे। एहदे शा पैहले रक्षा मंत्री होरें बी नमीं दिल्ली च इक उच्ची सतह दी बैठक सदियै पच्छमी बन्ने दी स्थिति ते भारतीय थेआरबंद बलें दी कारवाईण सरबन्धी तैआरिण दी समीक्षा कीती ही। इस बैठक च बी त्रौनें सेनाएं दे प्रमुख शामिल होए।

<><><><><><>

LG-Message(byte)

लेफ्टिनेंट गवर्नर मनोज सिन्हा होरें आखेआ ऐ जे भारत नै आतंकवादिएं दा समूलचा नास करने दा धेइया करी लैते दा ऐ ते जेकर दुश्मन आसेआ कुसै बी भारती बसनीक गी निशाना बनाया गोआ तां साढ़े थेआरबंद बलें दुश्मनं गी चुनी-चुनियै खत्म करडन। एलजी होरें एह गल्ल अज्ज बारामूला च सुरक्षाबलें दे जवानें कन्नै गल्लबात करदे होई आखी। उ'नें भारती जवानें दी दलेरी दी सराह्वा कीती ते आखेआ जे खुशहाली दी बुनियाद रमानदारी ऐ। उ'नें लोकें गी जकीन दोआया जे ओह सुरक्षित हत्थें च न ते देसै दी राक्खी लेई थेआरबंद बलें दे धेइये गी उ'नें सलाम कीता। इस मौके पर सुरक्षाबलें दे जवानें कन्नै गल्ल करदे होई उपराज्यपाल होरें आखेआ

<><><><><><>

CM-Meeting

मुख्यमंत्री उमर अब्दुल्ला होरें लगातार गोलीबारी दे कारण बन्ने आले जिले च राहत ते उत्थें रौहने आले लोकें गी कडिडयै सुरक्षित थाहरें पर पजाने दे जतनें दा इक बैठक लाइयै जायजा लैता। बैठक च डिवीजनल कमीशनर रमेश कुमार ते डिप्टी कमीशनरें जनेह वरिष्ठ अधिकारी शामिल हे। बैठक सेहत दिक्खभाल दी तैआरियां, लाजमी सप्लाई ते रौहने दे विकल्पें पर केन्द्रित ही। मुख्यमंत्री होरें जमीनी सतह पर कुशल संचार, लाजमी चीजें दे तौले अधिग्रहण ते ब्लैक आउट प्रोटोकाल जनेह सुरक्षा उपाएं दी पालमा करने दे महत्व पर लोह पाई। उनें आपात फंडे दे इस्तेमाल दा बी जायजा लैता ते नागरिकें दी फहाजत ते प्रभावत खेत्तरें च उंदी सुरक्षा निश्चत करने आस्तै तेज ते नेड़मे तालमेल आली कारवाइएँ दी लोड़ पर जोर दित्ता।

<><><><><><>

CM-Civil Society Members

जम्मू च पाकिस्तान आस्सेआ कीते गेदे झोन हमले परैंत मुख्यमंत्री होरें सिविल समाज दे सदस्यें कन्नै गल्लबात करियै सार्वजनिक सुरक्षा आस्तै लागू कीते गेदे उपाएं ते तैआरिएं दी स्थिति ते उनें चुनौतीपूर्ण समें च फिरकापरस्त सद्भाव जकीनी बनाने दी लोड़ पर चर्चा कीती। इस कार्यक्रम दे दरान मुख्यमंत्री होरें लोकें गी शांत ते सौहगा रौहने दा आग्रह कीता ते बसनीकें गी घबराने कोला बचने ते अधिकारिक सूचना स्ट्रोतें पर गै निर्भर रौहने आस्तै आखेआ।

<><><><><><>

ते हुन बाकि दिएं खबरें कन्नै कुनाल श्रीवत्स।

<><><><><><>

Itoo Dar Visit(byte)

मुख्यमंत्री उमर अब्दुल्ला हुंदे हुकमै परैंत कैबिनेट मंत्री सकीना इत्तू ते जावदे अहमद डार होरें बन्ने पारा गोलाबारी दे बाद आली स्थिति दा जायजा लैने आस्तै सरहदी जिले कुपवाड़ा दा दौरा कीता। उनें गौरमेंट डिग्री कालेज सोगाम ते बॉयज हायर सैकेन्डरी स्कूल च रौहा करदे विस्थापत परोआरें कन्नै मलाटी कीती ते उत्थें कीते गेदे इंतजामें दा जायजा बी लैता। मंत्रिएं अधिकारिएं गी निर्देश दित्ते जे ओह इस गल्लै दा ध्यान रखन जे सब्बै लाजमी सुविधां मजूद न ते प्रभावत बसनीकें दे कलयाण गी तरजीह दित्ती जा। उनें इनें राहत केन्द्रें दी लगातार निगरानी ते विस्थापत लोकें दी दिक्खभाल ते समर्थन आस्तै लोड़चदे कर्मचारिएं दी लोड़ पर बी जोर दित्ता। मीडिया कन्नै गल्ल करदे होई मंत्री सकीना इत्तू होरें आखेआ

<><><><><><>

Minister Rana

पूरे पीर पंजाल क्षेत्र च नियंत्रण रेखा पर हालात दा जायजा लैने लेई मंत्री जावेद अहमद राणा होरें इलाके दा दौरा कीता। उनें मकामी प्रशासन गी निदेश दित्ता जे राहत कम्में च तेजी आनदे होई आम लोकें दी सलामती ते सुरक्षा गी जकीनी बनाया जा। लोकें गी हर चाल्ली दी मदद ते सैहयोग दे सरकार दे घेइयै गी फही पक्का करदे होई मंत्री होरें अधिकारिएं गी पूरी चाल्ली सौहगा रौहने, जरूरी सेवाएं गी बहाल रखने, सुरक्षत थाहरें पर आंदे गेदे लोकें दिए जरूरतें गी तरजीह देने दे निर्देश दित्ते ते आखेआ जे चुनौती आले इनें हालात च कुसै गी कोई दिक्कत पेश नेई औनी लोड़चदी।

<><><><><><>

Airport Closed

ब्हाई अड्डे सरबंधी भारतीय प्राधिकरण नै 15 मई तगर मुल्खे दे उत्तरी ते पच्छमी इलाकें च 32 ब्हाई अड्डे थमां बहाई डोआरियां आरजी तौरा पर बंद रखने दी घोशणा कीती ऐ। इनें ब्हाई अड्डें रु अमृतसर, चंडीगढ़, जम्मू, श्रीनगर, भुज, जामनगर, जैसलमेर, पठानकोट, बगैरा शामिल न। एहदे इलावा दिल्ली ते मुंबई ब्हाई सूचना क्षेत्र च बी ब्हाई ट्रैफिक सेवा रस्ते पर 25 हिस्से पर बी इस अरसे दरान जहाज डोआरी नेई भरगन।

<><><><><><>

Media Advisory

सबबने मीडिया चैनलें ते डिजिटल प्लेटफार्में ते सोशल मीडिया दा इस्तेमाल करने आले आम लोकें गी बी सलाह दित्ती जंदी ऐ जे ओ फौजी कारवाइएं, सुरक्षा बलें दी आओजाई ते इस चाल्ली दिए गतिविधिएं दे वीडियो गी शेयर नेई करनकी जे इआं करने कन्नै महत्वपूर्ण अभियान प्रभावत होई सकदे न ते लोकें दी जान गी खतरा होइ सकदा ऐ ते कारवाइएं पर बी असर पेई सकदा ऐ।

<><><><><><>

Fact Check

पाकिस्तान दी कायराना हिमाकत पर भारत दा तगड़ेयाई आले परते नै बन्ने दे दूई बक्खी थमां गलत सूचनाएं च बाद्धा शुरू होई चुके दा ऐ। पाकिस्तान मीडिया ते जनता दी घोषणा गी घोखा देने आस्तै नकली वीडियो ते बदली दिए तस्वीरें दा पाकिस्तान आस्सेआ प्रसार कीता जा'रदा ऐ। लोकें गी आग्रह कीता जंदा ऐ जे ओह सब्बै जानकारी दी तस्दीक करन ते कुसै बी संदिग्ध सामग्री दी रिपोर्ट पीआईबी फैक्ट चेक गी मोबाइल नंबर 8799711259 पर व्हाट्स ऐप दे राएं जां फही socialmedia@pib.gov.in पर ईमेल दे राएं देन।

<><><><><><>